

Date – 19/05/2025  
Time - 7:30 -7:40Hrs  
AKASHVANI AIZAWL

## REGIONAL NEWS BULLETIN

### HEADLINES (MORNING)

1. Mizorama Myanmar raltlan awmte mit naute thlalak leh kutzia chhinchhiahna (biometric data) khawn khawm hna chu bul tan thei tura ruahmanna siam mek a ni..
2. Champhai khaw veng pahniha hnawksak zawnga che Myanmar raltlan ni a hriatte chu Police-in ramri-ah hel pawl Chin National Army kutah an hlan.
3. Union Home Minister Amit Shah-a chuan Operation Sindoor chu firfiakte dona kawnga mellung thar phunna a ni a ti.
4. Maharastra leh Telangana-a kangmei chhuakah mi 25 an thi.

<><><>

### BIOMETRIC IDENTIFICATION

Mizorama Myanmar raltlan awmte mit naute thlalak leh kutzia chhinchhiahna (biometric data) khawn khawm hna chu bul tan thei tura ruahmanna siam mek a ni.

Home department hotute hnen atanga thu dawn danin kar kalta Zirtawpni khan ministry of home affairs (MHA) thuneitute nen hemi chungchang hi biakhmuhtheihna kaltlangin sawiho a ni a. Ruahmanna lo siam lawk tawhte a taka kalpui tura inbuatsaih mek zel a ni a, bul tan theih thuai tum a ni. Home department hotute chuan Myanmar ram tlanhhiatsana Mizorama awm mekte biometric enrolment kalpui tur hian sorkar laipui chuan MNF sorkar hun lai atang tawh khan an rawn nawr tawh a. Mahse, online portal a a khawnkhawm dan tur an rawn dah kha an rama thawnkir turte tana duan a nih vangin Mizoram sorkar chuan siamtha turin MHA lamah an vawm thla leh a. Tun hnu a an rawn siamthat tak hnu-ah ruahmanna hi a thara kalpui a ni leh ta a. Tunah hian engkim peihfel tawh a nih avangin raltlante biometric data lakkhawm hna hi thawh theih thuai tura an ngaih thu home department hotute chuan an sawi a ni.

Kum 2021 March thla chawhma lam atanga an ram chhuahsan a Mizorama rawn lut tan Myanmar raltlante hi tun dinhmunah hian 33,023 an awm mek niin sorkar chuan a chhinchhiah a. An zinga mi 17,551 te hi raltlan dahkhawmna hmun 125-ah an awm a, mi 15,472 te erawh chuan an chhungkhat lainate leh thiante an belh loh pawhin mi in luahin an

inhlawhfakna hmunah an khawsa a. Raltlan awm mek zinga 12,361 te hi naupang an ni a, mi 10,416 chu hmeichhia niin mi 10,246 te chu mipa an ni. Champhai district-in Myanmar raltlan a mikhual hnem ber a, raltlan 13,586 zetin an cham chilh a. A dawtah Lawngtlai district-in mi 6,017 mikhualin Siaha district-ah 4,976 an awm a, Aizawl district-ah pawh 3,716 awmin an awm tlem berna Kolasib district-ah erawh chuan mi 129 chauh an awm a ni.

He tih lai hian home department hotute chuan Bangladesh atanga raltlan Mizoram a awm mek mi 2,000 chuangte chungchang chu an hriat rih loh thu an sawi a. Biometric enrolment khawn a nih ve tur leh tur loh chu Myanmar raltlante endik zawh lamah sorkar laipui thu ang anga kal pui a ni dawn niin an sawi a ni.

<><><>

#### DEPORTATION

Champhai khawpui veng pahniha hnawksak zawnga che Myanmar raltlan ni a hriatte chu YMA-te'n hrengin Police-in ramri-ah hel pawl Chin National Army (CNA) kutah an hlan.

Champhai YMA sub headquarters hruaitute hnen atanga thudawn danin raltlan nia hriat, Lalneihchhunga ti a hriat bawh Bawineisuma chu, "Mipui sipai ka ni," tiin chem nen khawlaiah a inhrosa a, pawl khawih thei nia an hriat avangin Dinthar YMA-in an khuahkhirh a, Police kutah an hlan a. Bawineisuma hi mipui sipai ni awm taka kawr rang ha fo thin ni a sawi a ni. Hei bakah hian New Champhai YMA hruaitute chuan Myanmar mi, raltlan ni a hriat - Vanlalrinchhana, Bawihliana, Siangthachhung, K.D. Liana, Vanbawiha leh Sangbawihthang te chu thlama ualau taka zu an in avang leh CNA sipai chawl mek ni a inchhal a an pawr hle avangin avangin an hreng a. Anni 7 hi Police hnenah hlanin Police te chuan Myanmar ramri lamah hruai-in CNA thuneitute hnenah an hlan a. Champhai Sub-YMA hruaitu, Raltlan Sub-committee, Dinthar leh Vengthlang Branch hruaitute chu he'ng mi 7-te Police hnena hlantu an nih thu dawn a ni.

<><><>

#### LAND GIFT

Aizawl Kulikawn venga cheng Pu Vanlalngaia'n Hlimen Chuhvela a ram bigha 7 point 5 a zau chu Synod kutah a hlan.

Ram inhlanna hun hi Pu Vanlalngaia in, Kulikawnah buatsaih a ni a. Mizoram Presbyterian kohhran Synod Executive Secretary Rev. Dr. Rosiamliana Tochhawng in he hun hi a kaihruai a, ram neitu Pu Vanlalngaia'n a ram chu Synod kuta hlan a duh chhan sawiin Pathian hnenah a kum a pawhseisak chu tangkai takin hmang tura a dil ve thin thu a sawi a. Chu'ng zingah chuan Mizo thalai a sing tel teh meuh Setana'n an taksa leh an thlarau tihlum a, hremhmuna a hruai lut tur hi chhanchhuahna beihpui thlak a ngai tak taka a hriat thu leh, kohhranin hemi kawnga hma la se a lo tih rilruk ve thu a sawi a ni.

Ram inhlanna lehkhah hian ram neitu Pu Vanlalngaia leh Senior Executive Secretary Rev. V.L. Luaia Hranleh ten hming an ziaak a, hriatpuitu

atan Executive Secretary Rev. Dr. Rosiamliana Tochhawng leh Upa K. Zoremsanga, Kulikawn ten hming an ziak bawk. Chumi hnu-ah Pu Vanlalngaia chuan thlarau bo pahnih/khat tal chhanchhuaha an lo awm theih na'n tiin Rev. V.L. Luaia Hranleh hnenah ram pekna lehkha hi a hlan a ni. He hunah hian Rev. Lalhleia, Director, Synod Prison Ministry chuan a tawiawm bawk.

<><><>

MAMIT LEADERS

Mamit Chhim Veng khawtlang chuan an veng vohbik naupang Lalremruata (kum 11) rawng taka thattu a puh R. Lalrinchhana chu an veng chhuahsan turin an ti.

Mamit Chhim Veng VC leh pawl hrang hrangte chuan kum August 17, 2023 a vohbik naupang kum tling lo, Lalremruata rawng taka thattu ni a hriat R. Lalrinchhana chungchangah Inrinni tuk khan VC House-ah inkhawm an ko a. R. Lalrinchhana hian an veng chhung a rawn rap leh tih hria-in an thinrim hle a Inrinni la la a an veng chhuahsan nghal turin an ti a. Mamit Chhim Veng VC leh tlawmngai pawlte chuan R Lalrinchhana’n Chhim Veng a rawn rap leh a nih chuan a chhungah leh a chhungte chhungah pawh engpawh thleng se, an chho chhuah a ni ang, an ti a ni. Mamit a kan Corr sawi danin Lalrinchhana hi Inrinni vek khan a chhungte’n Mamit atangin an phur chhuak leh nghal a ni.

He tualthihna chungchangah hian kum 2023 August ni 29 khan Mamit Chhim veng khawtlangin kawng an zawh a. Khami tuma mipui kalkhawm thuchhuah kha khauh taka kengkawh an tum thu Mamit Chhim Veng VC leh tlawmngai pawlte chuan Inrinni a an kalkhawmna-ah an sawi nawn leh a. R. Lalrinchhana hian an veng chhuahsan nghal tur a ni, an ti nawn leh a ni.

Thu dawn danin R Lalrinchhana hi Mamit Dist. Jail atangin Central Jail ah sawn a ni a, tun hnai-ah dam loh chhuan lamin bail a dil anga bail a chhuah a ni. Mamit Chhim Veng khawtlang chuan Lalremruata a thah chhan ni a R. Lalrinchhana sawi danah an lungawi loh thu an sawi a, thudik tak chhui chhuak tur leh dan anga na taka hrem an phut a. Amah chauh lo hi vohbik naupang tualthihna-ah thurualpui a neih ngei an rin thu leh chhui chhuah ngei an phut thu an sawi bawk a ni.

<><><>

ASF

Kumin March ni 20 a Mizoramah African Swine Fever (ASF) vawk pulhri a leng leh tan tih finfiah atanga tun thlengin vawk 4,000 a thi tawh.

Animal husbandry & veterinary department hotute sawi danin nimin khan Siaha khawpui a veng 4-ah vawk pulhri avangin vawk 12 a thi leh a. Niminah khan vawk hri darh zel tur venna atana vawk suat a awm lo thung. Mizorama district 3 hmunpui, Siaha, Lawngtlai leh Mamit district-a Zawlnuam khua-a veng 54-te chu ASF vawk pulhri lenna-ah puan a ni tawh a. Siaha khawpui-a veng 29-ah vawk 2,417 a thi tawh a, Lawngtlai khawpui-a veng 17-ah vawk 1,436 thi tawh bawkin Zawlnuam khua-a veng 3-ah vawk 173 leh

Lunglei khawpui a veng 5-ah vawk 74 a thi tawh bawk a ni. Vawk pulhri darh zel tur venna atana vawk suat tawh zat hi 1,236 a tling tawh a. Siaha khawpui-ah vawk 775 suat tawhin Lawngtlai-ah vawk 359 suat a ni tawh bawk a. Lunglei khawpui-ah 54 suat tawhin Zawlnuam khua-ah 48 suat a ni tawh bawk a ni.

Kumin hian March thla laihawl vel atang khan Lawngtlai khawpui leh Mamit district a Zawlnuam khua-ah vawk thi leh damlo engemaw zat report a awm leh avangin vawk thi leh damlo sample te la-in endik a ni a. March ni 20 khan Guwahati a laboratory chuan African Swine Fever vawk pulhri vang a ni tih a rawn nemnghet a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

HM

Union Home Minister Amit Shah-a chuan Operation Sindoor chu firfiakte dona kawnga mellung thar phunna a ni a ti. Nimina Ahmedabad Municipal Corporation hnuaia hmasawna project hrang hrang cheng vaibelchhe 1500 hu a hawnaah he thu hi sawiin Pu Shaha chuan Operation Sindoor hlawhtlinna chu Prime Minister Modia'n politics lam atanga a tumna tak takte, sipaite huaisenna leh Indian Intelligence agency te finna vang a ni a ti a. Kha operation khan India defence system chak zia leh Pakistan chu firfiakte tuallenna ram anih zia rawn hailang tu a ni a ti bawk.

Ramri kana firfiaka chetna chu khauh taka do chhunzawm anih tur thu sawiin firfiaka chetna leh sumdawna kaikawp a rem lo tia PM Modi-a dinna chu nghet takin an kalpui zel ang a ti bawk.

<><><>

MAHARASTRA & TELANGANA

Maharastra leh Telangana-a kangmei chhuakah mi 25 an thi. Maharastra-a MIDC industrial area-a towel siamna hmun kangah industry neitu telin mi pariat an thi a. Kangmei hi nimin zing 3.30 vela chhuak niin kangthelhtuten a hmun thleng nghalin zing dar 5.30 velah an thelh mit thei a ni.

Telangana-ah pawh Hyderabad khawpuia Gulzar House bula kangmei chhuakah chhungkaw member 17 an thi a. Mitthi zingah hian naupang kum 7 hnua lam 8 lai an tel a. Kangmei chhuah chhan hi electric kal dik lo anih thu Director General of Telangana Disaster Response and Fire Service Y Nagi Reddy chuan a sawi.

President Droupadi Murmu leh Prime Minister Narendra Modia te chuan kangmei chhuak avanga thi te an tawrhpuì thu an sawi a. Pu Modia chaun PM National Relief Fund atangin ralna sum cheng nuai 2 theuh pek an nih tur thu a sawi a.Telangana sawrkar pawhin cheng nuai 5 theuh an pek tur thu a puang a ni.

<><><>